

# «Avair quità da natira ed ambient»

La FMR ha fatg trais dumondas a l'apero da Grischun Vacanzas

DA GION NUTEGN STGIER / FMR

*Bunamain be glied cuntenta han ins vesì ils 3 da schaner 2020 tar l'apero da Bumaun da Grischun Vacanzas. Da sperar saja che la stagiun turistica cun-*

*tinueschia cun quel chatsch sco ch'ella haja cumenzà, è vegnì ditg da pliras varts. En il Grischun datti strusch in'occurrenza ch'attira uschè blera prominenzia sco l'apero da Bumaun da l'organisaziun da marketing Grischun*

*Vacanzas. Er quest onn è stada da la partida ina societad illustra dal Grischun per sa laschar ir bain cun rosoli, vin alb e da tuttas sorts piculezzas da mangiar. Persunas da num e pum da l'entir chantun èn vegnidas en la sala*

*da l'hotel Marsöl a Cuira per far in viva sin il nov onn. Ina giada dapli è il motto stà: Vesair e vegnir vesì. La FMR ha gist prendì la chaschun a quest'occurrenza tradiziunala per dumandar ad intginas persunas mintgamai trais*

*dumondas sin il nov onn:*  
**1. Tge sperais Vos dal 2020?**  
**2. Tge vulessas Vos emprender en quest onn nov 2020?**  
**3. Tge ubain tgi duess survegnir dapli atenziun durant l'onn 2020?**



**Philipp Bühler,**  
mainagestiun Grischun Viva

Per il Grischun sper jau che turisticmain hajan nus in bun onn. L'economia para da crescer e per Grischun Viva sper jau che l'organisaziun haja tant success sco l'onn passà cun ina partenza excellenta.

Per mai èsi fitg impurtant d'emprender ad enconuscher mintga singul producent e la glied che stat davos quels pro-

ducts. En il Grischun avain nus in'immensa schelta da products e quai fa plaschair.

Davart da la populaziun grischuna avess jau il giavisch che quella haja dapli conscienza ed enconuschientscha per noss products en il chantun e ch'ella dettia dapli atenziun e saja pli loscha dals products indigens e regionalis.



**Carmelia Maissen,** presidenta communal Ilanz/Glion

Jau spetg da l'onn 2020 nov ch'jau sappia consolidar quai ch'jau hai entschert ils davos dus onns sin il champ communal e che nus chattian soluziuns per tut quellas tematicas da tut gener che nus avain en il Grischun ed er en Svizra. Ussa ma legrel jau sin ina buna stagiun ch'ha gia cumenzà stupent.

Jau hai il privilegi ed il plaschair d'esser sco presidenta communal en ina situaziun ch'jau emprend mintga di insatge vitiers, vul dir durant 365 dis.

Sin champ naziunal, chantunal e communal duess nossa societad chattar ina soluziun adequata quai che pertutga la solidaritad.



**Brigitta M. Gadiant,** presidenta Svizra Turissem

La partenza da la stagiun è stada optimala ed igl è da sperar ch'i cuntinueschia. Sempel na vegni dentant betg, pertge in tschert basegn da recuperar è anc adina avant maun, er en ils territoris da muntogna. En noss turissem lavuran bleras persunas dal rom, l'engaschament da l'entira branscha turistica è fitg grond e nus avain er

ina natira fitg custavla e gist quai èn nossas bunas chartas.

En il turissem èsi adina pussaivel d'emprender insatge, da preschent è quai segir da sa posiziunar er quai che pertutga il clima e la digitalisaziun.

Dar dapli atenziun pudain nus anc adina a l'ospitalitad, ella ch'è in dals criteris principals en il turissem.



**Marc Gianola,** CEO HC Tavau

Da sperar è che turisticmain daventia il 2020 almain uschè bun sco l'onn 2019. Speranza datti blera naiv ed aura magnifica per il turissem ed er per il HC Tavau, per che quel sa qualifitgeschia per ils playoffs e fetschia almain il zap en ils mezs finals dals playoffs, sche betg perfin giugar per il titel.

Da mintga sbagl sa laschi emprender insatge e quai vegn er quest onn 2020 ad esser uschia.

Globalmain, dentant er per nus Grischuns e per noss chantun, èsi da grond'impurtanza d'avair quità e da dar grond'atenziun da nossa natira.



**Flavio Godenzi,** commember direcziun Grischun Vacanzas

Jau sper che turisticmain cuntinueschia l'onn gist uschè sco ch'el ha cumenzà. Ina buna partenza cun be giasts cuntenents, hoteliers ed ustiers che han fatg bunas fatschentas e giblers giasts. En il vair senn dal pled in bun inizi.

Cun mintga midada da l'onn è er avant maun la cha-

schun d'emprender insatge da nov. Finì d'emprender n'èsi mai.

La collavuraziun tranter tuts purtaders turistics, saja quai organisaziuns, pendicularas, hoteliers e gastronoms, a quella èsi da dar blera atenziun per avair success da cumianza.



**Karin Niederberger,** presidenta Uniun svizra da jodladers

L'onn 2020 ha entschert stupent. Cun tegnairen ensem, saja quai il turissem, la mastergnanza ed er il turissem essan nus segir abels e pronti per in bun avegnir turistic, lain sperar.

Er nus Svizras e Svizzers avain d'emprender d'avair dapli quità da l'ambient ed er

da la natira. Quai cunzunt per nossa generaziun vegnenta e per tut il turissem ed uschia il futur dal chantun.

Noss chantun Grischun è in dals pli bels flatgs en Svizra, e gist perquai avain nus tuts da tegnairen ensem per ir maun en maun vers in bun avegnir.